

## **Būkēt gerē, nežadinkēt monēs**

Pareisio tīke tīke be žingsniu,  
Jog pareitē galio tik sapnie.  
Tēn vakarās šalta rasa lasīsio,  
Ont smēlgas kap žemougēs versio.

Bukēt gerē, nežadinkēt monēs.  
Aš tik nuorio atrastē, kas bova –  
Prūdali, nakti prēkrētusi žvaigždiū,  
Šalēp žilvīti palinkosi smūtna.

Pavasārēs suodnalis švēitē ēš tuola,  
Tuoki brongi gimtuoji truoba.  
Viejou papūtos aplinkou sokiuojuos  
Bliekēnis gaidīs ont stuogo.

Netuolēi par lonka opēs tekiejē,  
Pakronties kvepontēs ēivas augēna.  
Musti ana bova čīsta, be grieka –  
Dēltuo vēsē Švēntuojē vadēna.

Je pažadinsēt, nieka aš tēn nebrasio,  
Matīsio tikta laukus tīrus.  
Ēš zlastēs vies sovels monēi plaukus,  
Nebrasdams longinīčiu draskītē.

Aš nekriuoksio – lītos tik lis,  
Šaltē lašā mon par žondus rēities...  
Šērdēis suopoli gēlēi gēlēi pakavuosio,  
Anuo nieks, čīsta nieks neregies.